

*Po kandji, v'la ène pitite riprîje. Sakants, î
vèyenu on grand sacrilèdje. Pinzèz, awè
wazu pèstèler dins l' corti d'on vrayi
sacrîdjeu èt, co pîre, d' awè lèyî rmète après
lès cruwauds è rfondou pa Louline !*

Li Bon Diè eburtake voltî ses voyes

El prumî boket : El fieû d' årmonaks

On bouche a l' uch, eyet radjeuzmint co.
Vouss wadjî ki c' est dèdja li ? El pwartheu d'
bounès paroles, el fieû d' prèchi-prètchas et l'
dijeu di spots, li bètch-tofer-è-cu-d'-pouyon ? I s'
invite can i nn a l' idéye, can ça l' arindje; bén
sûr, di pu souvint k' a s' toû. Il a del chance ki dj'
i n' sé pu hote et ki dji n' a pu were, - dijans
puråde pu rén - a dire véci, è m' cassine.
Gn a co sacants anéyes did ci, dji l' årève dispû
lontimp foutu a l' uch. I n' årève toudi pu wazu
rmète ses pîs su m' soû. Asteure, il est trop târd.
Dji so clawé podbon didins m' fôteuy, clawé
avou m' rodje couverte dissu mes fayéyès
djambes. Ele rouviynut di m' soutnu et batnut l'
berloke, savoz... Rén k' a l' ètinde ariver, li, èle
wachotnut co dpu. Alèz, dji so co don in
côp d' pu condâné a l' choûter rênairi s'
grande gu... babéye toute ci dânéye chîje
ci.

Anfin, di ces timps ci, i raplike mwinse
souvint è m' mājone, gn ddja pont d' mâ.
I chènreuve ki c' e-st a cāze k' il a do
succès avou ses viyès biestriyès d'
årmonak. Pu seurmint véci, dins l'
vwèzinådje, nonna, mins djusk' a Bén lon,
parèt. I n' si continte pu d' raconter ses
fâves, ses spots et ses paskéyes a l' èglije,
i lyi fât ène novèle et wôte et co pu wôte
assistance ki l' cîne des djins did ci, ses
binamés viladjwès, dijéve-t i.

Et ni vla-t i nén k' i n' si sint pu, i t' el fât voy
come i s' rëcrestéye dispû k' i t' fait des swèréyes
di galâ, sapinse-t i li, djusk' a Nameur et co pu
lon. Parètréve k' i s' prind pou l' novuia trouvêre,
el troubadour, li pu grand conteu d' Waloniye et
co d' ôte pâ. I n' arive pu a sèrer comifâ l' col di
ses pagnas. Ça lyi sère trop fwârt å gozî. Mâgré
k' i les fait fé a ses mzeures, et di toutes les
coleures, come in vrayi artiste ! Et grochi, fârci
d' l' encolure, el ome.

Gn a minme yeu in timp èwouski des malonètes
avîn pinsé di l' acopler avou l' seur Sourire ! Ti
vwès l' dalådje ? Les ptits ? On årève sitî oblidjî
d' les nèyis a fait ! Fât i dire k' å djou d'
ådjourdu, i gn a lontimp k' i gn a pupont d' cote
a foute sul haye, èndon ?


El gasse [le festin]

Erwaite lu. Après awè passé dirèk pas l' cujène
et rwaitî dins les casroles et les keuwets, ni l'
vla-t i nén dèdja atâvlé ? Oyi, il a candminme
tôurné s' complimint a Mèliye su s' boune santé,
ses rodjès massales (fine frèche di tchôd, mins
ca, i l' a tnu pour li) et su s' novèle djane cote a
grandès fleurs.

Avou leye, mi feume, il est toudi Bén amiteus.
Li rconchance du vinte, savoz ! Avou mi, c' e-st
ène ôte sôre di mantche. A pwène s' i m' a dit
bondjou et mi stinde el bètchète di ses blancs
dwèts, toudi Bén nètes, jamai machurés, dins ène
richènance di bènèdiccion. K' i les wåde pour
li, i nn a co dpu dandjî k' mi !..

Bén sûr, dji fiéve chènance di dwarmu, mins i n'
a fait ni yène ni deus: i n' s' a nén rtourné pou m'
dispièter avou in grand " Et cwè, Zirè, co toudi
a rén fé ? " Et rire, avou ca.

Mâ elvé va ! I m' a tout chûte moustré s' gros
par-derrière. I n' a pont d' timp a piède avou mi
et vo l' la ddja presse a fé boune pansléye.



Fåréve nén cwere k' il est la pou mes bias ouy,
paski dji seu malåde et ki dj' a do mâ. Ki nèni,
camaråde. Mi, c' est l' boune escuse, li mwaije
rèson. El prêtresse, cwè !

Dins l' timp, i ratindéve co k' on li siève ène gote
d' ène sacwè ou l' ôte pou dazâr lyi douviè sn
apèti. Come s' il avéve dèdja stî sins ! Kession di
lyi fé prinde pacyince divant d' passer a tâve.
Asteure, k' il a pri l' pli, il a ses âjes. Véci, il est
come a s' mājone. " I n' vos fât nén prinde des
gants avou mi, savoz " di-st i. A pwène la, rouf,

On comache todi...

vo l' la ki t' rapice li boutéle di Sinzano et ki s' vûde in vere ki n' va nén dmeurer fwârt lontimp mierseu dins s' ronduwe boutike.

" Carpe Diem ! " di-st i souvint. Dji n' a nén fait mes "latrines" èmon les frêres, mi, mins i m' chène k' avou çoula, i vout dire " Dji mougne timp k' c' est tchôd, dji n' ratind nén k' ça rafrediche. On sait jamai kîski pôreve co vnu ! " Nonna mins, t' el vwès la ? I mel va co vudî, séss, el bwesse di " prind-pacyince " ki Mèliye vent di mète sul tâve ! Fât i dire ki ci n' est nén ène pougniye di "Taca-rwaite-tes-dwèts-èt-s'-les rlètchî-z-après" ou d' gâte-fwin à fromâdje ki lyi va fé passer ène miète sn inviye di bèn mougû ou lyi gâter l' apèti ? Après tout, i n' est la k' pou ça !

Come intréye, après on crâ bouyion d' pouye, i t' mougne come pou rén ène diméye lîve di djambon d' Årdène avou ène platéye des pu bèlès salâdes di m' djârdin. Audjourdû, i t' va co fé chûre çoula d' ène sacréye assiétéye di lapen às bulokes. Et co si risservu, "sins fé des manères, savoz !" trossi lontimp k' il è dmeure ène miète a tâve dins l' mârmitte.

Nosse Mèliye ti m' kujène ci bisteu la, dji n' ti di nén ! Avou do pwin d' épices pou rloyî l' sâce, sacants finès trintches di lârd, des ptits agnons, ène miète di vinègue di vin et co on vere di pèket stâré ddins pou "l' finesse"...

Dji n' è pou pu mougnî mins dji nn a co l' gosse ki m' rivent è m' bouche..Rén k' a c' t' idéye la, dji blèfe co dpu k'd' abitude et nén yink pou m'vinu richoûrbu l' minton... I n' pinsnut pu k' a mougû !

Waite lu, i gn a ddja ses dints di drî ki bagnnut. I t' fè diskinde çu k' i mougne avou des grandès gouléyes di mes derènes viyès boutéyes di Sint Amôûr. I m' è va co rloper ène et dméye et s' indaler avou l' dêrène mitan è s' potche. " On n' set jamais. Kékfiye k' i m' vègne co in visiteu avou ène mwaije fwin et ène pitite swè è m' cûre, ttaleure ! N' est-ce pas donc hin ?

" Tèje tu, minteu ! Ti li fra bèn in sôrt tout seu, avant di t' couchî. Ti n' serève nén l' mitan d' in clatcheu, t' el dirève ki, pou l' momint, ti vous wârdèr del place pou l' boute-cafeu ! Ci n' est nén pou rén ki l' rodje di t' nez divent come li cingue do cardinâl. Bèn sûr, gn a nén k' véci k' t' a bon. Tè les conès bèn, toutes les bounès tâves do vilâdje. Pou fini, ti n-ènnira, nén è chaltant, avou les deus veres di m' mèyeuse pwâre ki vont chûre les cate cink vêtes à brun suke et tes trwès jates di nwâr cafeu do dessert !

Gn a sacant anéyes, il avéve vinu passer l' chîje et djouwer à couyon èmon nozôtes avou l' abé Sinto. Co yink d' ancyns profeseurs ki profitéve

di s' pinsiyon et di s' meskène ètout sayant di scrire des lîves di sovances su s' vilâdje et l' vikêriye di s' djonne timp. Dji les ètind co, les deus fén bwèveus, tout riyants et dèdja dins les nuwâdjes do paradi des gozîs bèn ridants, et suwant bèn leus trapisses.

I djâzîn des avantâdjes di leu deus situwâciyons. " Awè bon in djoû ? Ti t' fous ène boune doufe. Ene samwîne ? Ti tuwes ti pourcia. In mwès ? Ti



t' acoupèle. Mins pou-z awè ène bèle vikêriye ? Fât k' ti t' feye curé d' vilâdje, valet ! "

Dji les ètind co chachler a grands brût et manker di si stronner tout bwèvant. " Alôss, ti vwès, twè, come curé, ti pous cumuler " k' i djéve li grand brake a Sinto. " Et ça n' ti cousse rén ! On



t' paye toudi des veres. Ti dwès rârmintrinde les


On comache todi...

toûrnéyes. Les boutchîs et les boulèdjîs ni t' font nén payî ti ptit boket d' lârd et t' mitche di pwin d' ome tout seu. T' as des invitâciyons a toutes les fiesses. Inte deus ètermints ou mariâdje, t' arives dins les mâjones a l' eure des rpas et on t' fêt ène place, li mèyeuse, al tâve. Des feumes ? Gn è-n a toudi bèn yène è ène place ou l' ôte can ça t' dismintche. T' es t' maïsse et ti n' rinds des comptes a nèlu. Ti trouves toudi des djins d' boune voltè pou doner l' catrissîme a t' place can i fât. Padzeu tout çoula, t' es co lodjî et payî.

" Dji m' souvint, el abé Sinto avève dimèré tout sondjeu. Li, i sayéve di rvinde les lîves di s' bibliotèque pou fé imprimer les sens [les siens].

Dji seu-st à rèjime et dji m'dwès continter d' el riwaitî mognî, fé bèbèle a Mèliye, et lèver s' vere " A l' boune vosse ! " tout rwaitant di m' costé, tout chourbant ses lèpes et s' crâ minton erlûjant di ses blèfures di contintmint.

Vo l' la ki raspèpiye el tiesse du lapen - li mèyeu boket del biesse, come li croupion pou les



pouyètes - et s' li têter et stichî s' linwe dins les trôs des ouy. I t' suce ça come in via padzou s' mère ou ène Monica s' prèzidint. Si front, ess minton et ses lèpes erlûjnut ostant yink ki lz ôtes. Et s' mi fât i supwarter di voy ci spectake la toutes les samwînes. Avou li, ti pous yesse sûr ki dj' a dèdja spârgnî long d' avance su m' timp d' purgawere. Dj' a bia sayi di trouyî, rén a fé. Mes boyas sont trop sètch. Nén moyin di lachî ène boune vèce ki li gâtrève li nez eyet s' fayéye rafiyançe [sa maudite jouissance].

El pu deur la ddins, c' est k' après awè fè tinkî a make el pia di s' panse et disbloukter si cingue avou in sorire binâje, pognî dins m' bwesse di cigâres et tchwèsi in bia gro Tchurtchil, i va co m' èvoyî a rlaye dins l' nez des ptitès bleuwiassès fumères ki nodnut si bon [odorantes].

Adon, ses ouy son-st a mitan sèrés di benawreusté [béatitute] et i n' vwet nén, pou in grand goulafè, ki les minks sont plins d' euwe. Tanawète, Mèliye, leye, li vwèt, et èle mi les vent rchourbu. Ele pinse ki l' câze di ça, c' est l' fumère, mins èle serève toute èwarée di voy mes pogn sèrés a make, la, padzou m' viye coverte. Ça m' va lon d' el voy la, li, a rimpli s' panse.

Gn a rén a dire, gn a branmint des pu maleureus k' li. I n' avève nén dandjî d' ène nwâre soutâne pou-z awè ène place a pâr à mitan des djins, li. Avou s' grandeu, ess rondu d' vinte ey ess grande babéye di maïsse-berdelâd, i t' irève vinde do sâvlon à mitan do Sayel. On t' el ritapisse et hoy d' à lon ! I n' gn a k' pour li et il a toudi ène sacwè a dire su tout et su rén. Fât yesse djusse, il est souvint vèyu voltî... pou in timp.

Li timp d' el mî conèche et il est trop târd. I t' a dèdja èmantchî bèn parfond. I n' pinse k' a li. Les ôtes ? Rén k' des nén-grand-tchôze, des bons a rén, des mwinse-ki-li, tout djusses bons a l' choûter, lyi fé des complimints et des pléjis. Fât dire ki, pour li, " I gn a pont d' mâ a s' fé fé do bèn pàs ôtes " Et, i cotinuwer, ètout riyant et tapant su ses dgnos " come dijéve Terèse d' Avârla divant di s' fé sinte ! "

Oyi, il a des lètes.. I n' pinse k' a li. Ti lyi dmande ène pitite sacwè ? I rcâze ène eure d' asto pou nén t' responde et ti t' ritrouve sul sou d' l' uch, Grodjan pa padrî come pa padvant. Ti diréves ki c' est li k' a inventé li linwe di bwès des promèteus d' bias djous et des lèdmwins ki tchantront !

Et mâgré tout, c' est tout djusse si ti n' lyi dit nén co merci. Tout biesse, ti t' è sintirève co oblidjî ! I n' conet nén les rmwârs di concyince. Rén n' la jamai espètchî di bèn dwarmu.

On comache todi...